

涵芬樓古今文鈔

呂景端
書藏

通志樓古今文鈔

卷之四
書牘

涵芬樓古今文鈔卷四十四目錄

書牘類

書三

代李煜遺劉鋹書

潘佑

大名府請首薦張覃書

張詠

答王觀察書

張詠

答喬適書

穆修

答樞密范給事書

晏殊

答趙元昊書

范仲淹

游嵩山寄梅殿丞書

謝絳

與陳都官書

富弼

大遼求地界書

宋朝回書

契丹聖宗誓書

契丹興宗致宋仁宗書

契丹回宋誓書

與石推官第一書 歐陽修

與石推官第二書 歐陽修

答吳充秀才書 歐陽修

與晏相公書 歐陽修

回諫院傅龍圖攀違書 歐陽修

潁州通判楊虞部書 歐陽修

與高司諫書 歐陽修

答陝西安撫使范龍圖辭辟命書 歐陽修

答宋咸書 歐陽修

與刁景純學士書 歐陽修

與樂秀才第一書 歐陽修

與張秀才第二書 歐陽修

答劉蒙書 司馬光

與范景仁論樂書 司馬光

答程明道書 司馬光

與王介甫書 司馬光

與吳相書 司馬光

與四路招討司幕府李諷田棐元積中書尹洙

答張洞書 孫復

答韓持國書 蘇舜欽

與吳九論武學書 劉敞

答趙內翰書 蔡襄

答司馬君實論樂書 范鎮

請杜醇先生入縣學書 王安石

答韶州張殿丞書 王安石

答段縫書 王安石

答司馬諫議書 王安石

答吳孝宗論先志書 王安石

賀杜相公書 錢彥遠

與孫司封書 曾鞏

謝杜相公書 曾鞏

寄歐陽舍人書 曾鞏

貽蘇軾書 畢仲游

與王介甫書 劉攽

與容季書 王回

與兩浙安撫陳舍人薦士書 陳襄

謝倪評事禮書 陳襄

與門下韓侍郎書 范百祿

答蕭達林問討準布書 耶律昭

與章子厚書 蘇軾

與謝民師推官書 蘇軾

與王庠書 蘇軾

謝張太保撰先人墓碣書 蘇軾

答張文潛縣丞書 蘇軾

海文樓古今文鈔 卷四十四
答李廌書 蘇軾

答虔倅俞括奉議書 蘇軾

與滕達道書第二十二首 蘇軾

與李公擇書第十一首 蘇軾

與王庠書第五首 蘇軾

與李方叔書 蘇軾

代韓愈答柳宗元示浩初序書 王令

與趙大觀書 張載

與呂微仲書 張載

答橫渠張子厚先生書 程顥

答人示奏草書 程頤

答朱長文書 程頤

答外舅兵部杜侍郎書 晁補之

與秦少游書 陳師道

與石司理書 張舜民

與張江東論事書 吳孝宗

制置三司條例司論事 蘇轍

與王觀復書 黃庭堅

答李幾仲書 黃庭堅

答李推官書 張耒

與陳瑩中書 陳師錫

涵芬樓古今文鈔卷四十四

侯官吳曾祺纂錄

書牘類

書三

代李煜遺劉鋹書 潘佑

某與足下叨累世之睦。繼祖考之盟。情若弟兄。義敦交契。憂戚之患。曷常不同。每思會面而論此懷。抵掌而談此事。交議其所短。各陳其所長。使中心釋然。利害不惑。而相去萬里。斯願莫伸。凡於事機。不得款會。屢達誠素。冀明此心。而足下視之。謂書檄一時之儀。近國梗概之事。外貌而待之。汎濫而觀之。使忠告確論。如水投石。若此則又何必事虛詞而勞往復哉。殊非宿心之所望也。今則復遣人使。罄申鄙懷。又慮行人失辭。不敢深素。是以再寄翰墨。重布腹心。以代會面之談。與抵掌之議也。足下誠聽其言。如交友諫諍之言。視其心如親戚急難之心。然後三復其

言。三思其心。則忠乎不忠。斯可見矣。從乎不從。斯可決矣。昨以大朝南伐。圖復楚疆。交兵以來。遂成釁隙。詳觀事勢。深竊憂懷。冀息大朝之兵。永契親仁之願。引領南望。于今累年。昨命使臣入貢。大朝皇帝果以此事宣示。且彼若以事大之禮而事我。我則何苦而伐之。若欲興戎而爭。我則以必取爲度矣。今見點閱大衆。仍以上秋爲期。使人陸昭符奏乞更於未間。令弊邑以書復敍前意。是用奔走人使。遽貢直言。深料大朝之心。非有唯利之貪。蓋怒人之不賓而已。足下非有不得已之事。與不可易之謀。殆一時之忿而已。觀夫古之用武者。不顧小大強弱之殊。而必戰者有四。父母宗廟之讎。此必戰也。敵人有進。必不捨我。求和不得。退守無路。戰亦亡。不戰亦亡。奮不顧命。此必戰也。彼有天亡之兆。我懷進取之機。此必戰也。今足下與大朝非有父母宗廟之讎也。非同烏合存亡之際也。既殊進退不捨奮不顧命也。又異乘機進取之時也。無故而坐受天下之兵。將決一旦之命。既大朝許以通好。又拒而不從。有國家利社稷者。當若是乎。夫稱帝稱王。角立傑出。古今之常

事也。割地以通好。玉帛以事人。亦古今常事也。盈虛消息。取與翕張。屈伸萬端。在我而已。何必膠柱而用壯。輕禍而爭雄哉。且足下以英明之姿。撫百越之衆。北距五嶺。南負重溟。藉累世之基。有及民之澤。衆數十萬。表裏山川。此足下所以慨然而自負也。然違天不祥。好戰危事。天方相楚。尙未可爭。恭以大朝師武臣力。實謂天贊也。登太行而伐上黨。士無難色。絕劍閣而舉庸蜀。役不淹時。是知大朝之力難測也。萬里之境難保也。十戰而九勝。亦一敗可憂。六奇而五中。則一失何補。況人人自以我國險。家家自以我兵強。蓋揣於此而不揣於彼。經其成而未經其敗也。何則。國莫險於劍閣。而庸蜀已亡矣。兵莫強於上黨。而太行不守矣。人情端坐而思之。意滄海可涉也。及風濤驟興。奔舟失馭。與夫坐思之時。蓋有殊矣。是以智者慮於未萌。機者重其先見。圖難於其易。居存不忘亡。故曰。計福不及。慮禍過之。良以福者人之所樂。心樂之故其望也過。禍者人之所惡。心惡之故其思也忽。是以福或修於慊望。禍多出於不期。又或慮有矜功好名之臣。獻尊主強國之議者。

必曰決無和也。五嶺之險。山高水深。輜重不並行。士卒不成列。高壘清野。而絕其運糧。依山阻水。而射以強弩。使進無所得。退無所歸。此其一也。又或曰。彼所長者。利在平地。今捨其所長。就其所短。雖有百萬之衆。無若我何。此其二也。其次或曰。戰而勝。則霸業可成。戰而不勝。則泛巨舟而浮滄海。終不爲人之下。此大約皆說士孟浪之談。謀臣捭闔之策。坐而論之也則易。行之如意者則難。何則。今荆湘以南。庸蜀之地。皆是便山習險阻之民。不動中國之兵。精卒已逾於十萬矣。況足下與大朝封疆接畛。水陸同途。殆雞犬之相聞。豈馬牛之不及。一旦緣邊悉舉。諸道進攻。可俱絕其運糧。盡保其城壁。若諸險悉固。誠善莫加焉。苟尺水橫流。則長堤虛設矣。其次又或大朝用吳越之衆。自泉州泛海以趣國都。則不數日而至城下矣。當人心疑惑。兵勢動搖。岸上舟中。皆爲敵國。忠臣義士。能復幾人。懷進退者。步步生心。顧妻子者。滔滔皆是。變故難測。須臾萬端。非惟暫乖始圖。實恐有沒壯志。又非巨舟之可及。滄海之可遊也。然此等皆戰伐之常事。兵家之預謀。雖勝負未

知成敗相半。苟不得已而爲也。固斷在不疑。若無大故而思之。又深可痛惜。且小事大理固然也。遠古之例。不能備談。本朝當楊氏之建吳也。亦入貢莊宗。恭自烈祖開基。中原多故。事大之禮。因循未遑。以至交兵。幾成危殆。非不欲憑大江之險。恃衆多之力。尋悟知難則退。遂修出境之盟。一介之使。裁行萬里之兵。頓息惠民和衆。于今賴之。自足下祖德之開基。亦通好中國。以闡霸圖。願修祖宗之謀。以尋中國之好。蕩無益之忿氣。不急之爭。知存知亡。能強能弱。屈忍以濟億兆。談笑而定國家。至德大業無虧也。宗廟社稷無損也。玉帛朝聘之禮。裁出于境。而天下之兵已息矣。豈不易如反掌。固如太山哉。何必扼腕盱衡。履腸吮血。然後爲勇也。故曰。德輶如毛。民鮮克舉之。我儀圖之。又曰。知止不殆。可以長久。又曰。沈潛剛克。高明柔克。此聖賢之事業。何恥而不爲哉。況大朝皇帝以命世之英。光宅中夏。承五運而乃當正統。度四方則咸偃下風。獫狁太原。固不勞於薄伐。南轅返旆。更屬在於何人。又方且遏天下之兵鋒。俟貴國之嘉問。則大國之義。斯亦以善矣。足下

之忿。亦可以息矣。若介然不移。有利於宗廟社稷可也。有利於黎元可也。有利於天下可也。有利於身可也。凡是四者無一利焉。何用棄德修怨。自生仇敵。使赫赫南國。將成禍機。炎炎奈何。其可嚮邇。幸而小勝也。莫保其後焉。不幸而違心。則大事去矣。復念頃者。淮泗交兵。疆陲多壘。吳越以累世之好。遂首厲階。惟有貴國情分逾親。歡盟逾篤。在先朝感義。情實慨然。下走承基。理難負德。不能自己。又馳此緘。近奉大朝諭旨。以爲足下無通好之心。必舉上秋之役。卽命弊邑速絕連盟。雖善鄰之心。期於永保。而事大之節。焉敢固違。恐煜之不得事足下也。是以惻惻之意。所不能忘。區區之誠。於是乎在。又念臣子之情。尙不逾於三諫。煜之極言於此三矣。是爲臣者可以逃。爲子者可以泣。爲交友者。亦惆悵而遂絕矣。

大名府請首薦張覃書

張詠

昨日公府試罷。羣口騰議。以某名在張覃之右。雖未知實。恐惕無量。竊以張覃者。內實敏直。外示謙和。樂貧著書。十五年未嘗一日變節。事繼母恭懼。猶初授教時。

一家熙熙。有若太和之俗矣。且魏大都也。萬人畢詞。謂之君子。況郝馬魏之輩。十年。往往相與探討。某也不佞。心常慕之。明公下車在近。計部旋遣。將以某之文。近覃之文。未知覃之德。遠某之行。萬萬也。竊敢僭冒。聞于觀聽。惶恐惶恐。抑又聞古之取士也。先以德行聞。今之取士也。先以文詞聞。古之得士也。鮮。今之得士也。衆。藉其用。克歸於真。故周設俊造。專德行可進也。漢定四科。參衆善可進也。迄有唐大正貢部。偉行奇業者。盡取之。非行而文詞者。亦取之。流於百世之下。將爲不易之典。國家四海久安。賢俊間出。得士之衆。於古無上。猶復仄席思賢於內。詔諸侯貢士於外。恭惟明公以德行宏才。克應其選。一命而通治大郡。再命而通治大都。皇上速於用明公也。欲因明公之賢。誘天下之賢。某亦何人。來預明試。始隨貢士之列。卒得知言之地。感遇惟慰。通於胸懷。因欲盡陳其愚。伏望聽憐之。某嘗少年不量力。秉志勵行。期到古人。十五年。逼寒餓。絕往還。除比歲一甯親。則月無廢日。然其心頑難通。故文詞不迨於覃也。性復迂怪。執行望於覃遠矣。明公決以某爲

先是不知覃之善行。播某之惡也。若立覃爲先。則詭薄之俗可易。仁義之風可扇。又孚乎古昔尊德上賢之教也。幸甚幸甚。某若鬱而不伸。則負掩賢之過。言之越職。則有犯上之罪。伏望終始鑒宥之。

答王觀察書 張詠

少年無思算。好陪狂徒高談極飲。致踰壯歲。方遂策名。泊于登朝。又倅邊郡。塞外清帖。公中事稀。日與虎侯雜戲爲樂。五木未止。六博已興。投壺弈碁。排象旋子。斯實眇末。無足快心。其所至者。蹴鞠引強。擊射算帖。攘袂擊肘。嗥呼爭贏。有以壯臨軍之容。資佳會之具。其或八月草枯。皆縱獵。寒風吹面。則敝裂皮膚。驚塵隨人。則緇黑衣履。渴飲已冰之酒。飢食連血之肉。馬不絕馳。弓不下臂。知得俊爲快。不知勞筋爲苦也。又若天清氣和。列坐暢飲。樂奏繁劇。貔貅引前。盤槊擊劍。以電轉。奔騎角觝。以虎爭。餘興未窮。則巨觥相罰。非倒甕。非頽冠。略未云止。與希生者道。真堪喪魂。時弟年方盛。氣尙壯。酒量過常。遂成飲癖。洩入膜內。栖於鬲中。良醫不逢。